

林文忠公政書

湖廣奏稿

乙集卷一、二、三、四、五。

柳田文庫
文庫11
D 327
4



文庫11
D325
4

設法疏銷淮引片

再臣行抵楚境承准軍機大臣字寄道光十七

年二月十九日奉

上諭本日據訥爾經額奏稱上年楚省行銷淮鹽共計銷引七十三萬有奇較之銷數最暢之十四年分尙多六千餘引且自辛卯綱每引加斤計算已逾額銷之數實屬大有起色林則徐到任以後自必稽核舊章因勢利導仍當嚴飭各屬設法疏銷不可因甫有起色稍形疎懈至楚省行銷淮南鹽



48-12437

010190567139

引本屬一氣相通各該省大吏經朕委任必應熟籌情勢於劃清界限之中仍有並行不悖之意方稱辦理妥善林則徐曾經署兩江總督印務於鹽務素所熟悉其楚省應銷淮南鹽引早應成竹在胸現當接任之初尤宜盡心籌畫不分畛域督飭文武員弁巡商實力整頓堵緝鄰私搜查夾帶庶官引日形疎暢而國課益見充盈矣將此諭令知之欽此仰見

聖主整頓鹺綱

諄諄訓誨之至意伏查淮南引鹽雖由揚商納課而實資於楚省行銷誠如

聖諭本屬一氣相通必應熟籌情勢前督臣訥爾經額於督銷一事本已極力籌維况臣兩次署理兩江督篆曾經督辦淮鹺尤應痛癢相關曷敢稍分畛域伏讀

上諭堵緝鄰私搜查夾帶是督銷之緊要關鍵已蒙指示無遺蓋楚省鄰私來路最廣如川鹽由川江直下連檣急溜行駛如飛宜昌荊州固已充斥為

患而粵東粵西兩省私鹽灌入湘江亦皆滿載重船乘流四達寶慶衡州受害爲甚襄陽鄖陽安陸等府則與豫陝接壤蘆鹽潞鹽處處可通至應山隨州孝感黃陂麻城黃安等縣又與淮北票鹽地界犬牙相錯此鄰私侵灌之大概也其夾帶之弊緣淮南場鹽運至儀徵向例改捆子包上船裝載由長江沂流至楚路遠日長或託名於滷耗而包內暗加斤兩或藉口於拋撒而包外私帶腳鹽大抵船戶商厮串通弊混摺

工人役受囑放礮鹽斤卽有浮多既正引被其佔礙此江船夾帶之大概也臣此次由豫省信

陽州一帶取道赴楚留心察看該處數州縣皆食淮北票鹽色白味美顆粒亦大每斤市價僅錢三十文而緊連之應山等縣卽係湖北口岸應食淮南綱鹽其鹽由漢口陸運而往價值不止加倍而色味遠遜票鹽民間趨避情形遂如水之就下是卽鄰私侵灌之一端以此類推則川粵蘆潞各私皆可想見現查楚岸存鹽有四

十餘萬引其開江未經到岸者尙不在此數之內設法疏銷實爲急務臣惟有恪遵

聖諭將堵緝鄰私搜查夾帶二事實力嚴辦務使令行禁止弊絕風清斷不敢稍任疎懈除再悉心籌畫隨時具奏外合將奉到

諭旨欽遵辦理緣由先行附片覆

奏伏祈

聖鑒謹

奏

銅船夾私越卡摺

奏爲銅鉛兩幫船隻均越過鹽卡不聽查驗並於後幫追獲私鹽請

旨將失察之運員及不卽據實稟明之護總兵交部分別議處以肅鹺政事竊照准鹽銷路惟楚省引額最重而鄰私侵灌亦惟楚省路徑最多其尤甚者四川江船順流直下船艙夾帶視陸路不啻什倍而滇黔銅鉛皆由川船裝載藉差夾帶視他船又不啻什倍是以嘉慶二十三年

奏准於湖北巴東縣之官渡口一帶設立總卡川船經過皆須查驗放行嗣因銅鉛船隻不聽稽查道光十五年六月間前督臣訥爾經額奏奉上諭銅鉛船隻自四川裝運北上一路收買川鹽入楚售賣經由卡隘並不聽候查驗自非督飭嚴查不足以資鎮壓嗣後銅鉛船經由宜昌府所屬地方著卽飭令該鎮總兵親督卡運各員查驗催儆倘有水手抗拒及逃散挾制等事卽拏交地方官究辦一面代爲雇覓水手迅速開行以副例限並

著雲貴四川各督撫嚴飭運員務將船價水腳照數給發不准稍有尅扣運船過境飭令沿途各州縣加意稽查如有私行售給該船戶鹽斤卽行嚴拏懲治倘不認真查辦一經楚省查出夾私情事卽著行知川省覈實查參等因欽此仰見

聖主整飭離網杜私衛引之至意歷經欽遵查驗無夾帶者立卽放行乃本年三月間據稟貴州龍泉縣知縣童翬領運鉛船二十六隻過官渡口並不泊岸順流直下經巴東縣知縣饒拱辰派

木文忠公正書 乙集卷一
役隨同卡員追赴下游之新灘交護宜昌鎮倭
仁布就被驗放又四月間據稟有署雲南大關
同知彭衍墀領運銅船二十四隻過官渡口亦
不攏卡兵役追至斗山沱經倭仁布等起獲水
手所帶私鹽七百九十三斤當卽換雇水手仍
護送開行前進等情臣查彭衍墀所管銅船既
有起獲私鹽雖係水手夾帶而該運員失於覺
察且任聽越卡不泊咎實難辭至童輩所管鉛
船雖無起獲私鹽而該船越過官渡口卡而至

新灘已歷一百七十五里該處路路可以通私
安知非於越卡之後將鹽賣完始聽驗放其於
船戶冒越避查亦有失察之咎當此疏引杜私
之際誠恐相率效尤大妨鹺務相應請
旨將雲南運銅委員署大關同知事晉甯州知州彭
衍墀貴州運鉛委員龍泉縣知縣童輩交部分
別議處以示懲儆至護宜昌鎮總兵倭仁布理
應欽遵

諭旨親督卡運各員查驗若該船不聽搜查卽應稟

揭乃該護鎮僅以趕往新灘截驗一語含糊具稟並不將該船越卡情形明白聲敘迨閱巴東縣知縣饒拱辰稟內始有該船並不泊岸順流直下派役尾追之語飭查屬實是倭仁布前稟顯係意存遷就亦應請

旨將護宜昌鎮總兵之該鎮中軍遊擊倭仁布一併交部議處臣仍嚴飭該卡文武嗣後有船即驗既驗即放不得聽其飛越亦不許稍有耽延庶於鹽務銅運兩無妨礙抑臣更有請者向來銅

鉛船隻在川買私諸弊久荷

聖明洞鑒是以特蒙

勅諭雲貴四川各省禁運員之短發水腳懲沿途之

賣給船鹽

聖諭煌煌咸宜恪遵查辦以臣訪聞近來銅鉛船隻

多於川省瀘州馬頭及酆都縣之離沱子忠州之洋渡溪雲陽縣之城河口巫山縣之江東嘴青石峽跳石一帶裝買廠店川鹽其經過夔州關口亦因書役得規聽其偷漏實爲淮綱之害

合無仰懇

勅下四川總督轉飭夔州府於各船過關查稅之便
將所帶私鹽一併認真查起並飭瀘州鄆都忠
州雲陽巫山各州縣欽遵前奉

諭旨加意稽查如廠店私將川鹽賣給船戶卽行嚴
拏懲治倘意存膜視再經楚省獲私除失察透
私之州縣咨會川省查參外其縱漏之夔關一
併查取職名照例議處俾各顧考成不分畛域
以清川私來源臣爲籌疏淮引起見謹繕摺具

奏伏乞

聖鑒訓示謹

奏

聖鑒時示
奏為

附奏獲私變價按引提課片

再疏引莫先於緝私臣蒞楚後督飭各屬印委
員弁分投堵緝覈計月餘之內已報獲私販三
十八起私鹽一萬八千一百七十餘斤人犯八
十六名分飭審辦仍稽查各路卡隘務令認真
緝拏不許稍涉鬆勁惟是未獲之私鹽固有礙
於官引卽已獲之私鹽仍暗佔於銷數何以言
之緣獲私例應變價分別給賞充公而各地方
向來民食祇有此數多銷一分變價之鹽卽少

銷一分額行之引故有州縣緝私甚力獲鹽甚多而該地方額引轉見缺銷者初聞之似不可解及徐察之而後知變價之鹽所估礙於官引爲不少也然既獲到私鹽若不准其變賣又斷無別項出路而因變賣轉佔正額是緝私與疏引勢且兩妨殊非盡善之道臣思鹽之分別官私惟以有課無課爲斷變價給賞之例祇以鼓勵獲鹽之人卽一半充公亦僅資各處開銷經費於

國課仍無裨益莫若變通其法將所獲私鹽變賣之價先按引鹽課則提繳正款錢糧覈計此外贏餘已足敷給賞充公之用卽獲鹽之兵役亦皆不致向隅而變價可補官課之虧卽獲私足抵官銷之缺似亦疏引裕課之一道所有應納課銀由各州縣會同管卡員弁彙繳道庫轉解兩淮歸入該年額引覈數造報如蒙

勅部議准卽將本年報獲各案私鹽一律遵辦臣管見所及不揣冒昧謹附片具

奏伏乞

聖鑒訓示謹

奏

審擬監利縣糧書抗土鬧局各情摺

奏為遵

旨訊明監利縣糧書抗土鬧局各確情分別定擬恭

摺覆

奏仰祈

聖鑒事竊照承准軍機大臣字寄欽奉

上諭有人奏湖北監利縣隄工向係官徵民修每年

歲修土方六十餘萬派徵制錢六萬餘串由該縣

籤點董事發給印單收取土費糧書工書等輒用

林文忠公政書

卷一

湖廣奏稿

十一

木文忠公正書 卷一
墨券私收致董事賠累不足完工又有庫總六人
狼狽爲奸被控未結前經訥爾經額派員前往會
議章程設立總局收土並公舉誠正首士八人及
領修數十人分段遊修一切事宜不假吏胥士民
踴躍而蠹書等遂把持花戶不許赴局完土屢經
稟究藐玩如故一年所收土費不及三萬串餘皆
盡飽蠹橐本年四月庫總龔紹緒勾通糧書蕭之
桐糾眾抗土鬧局毆辱首士秦祖恩等縣令不爲
究辦從前吏胥包攬徵收縣令與汛員每年得陋

規數千串今改總局收土不能遂其需索蠹書尤
不利於總局百計尋釁本年七月十五日乘該縣
公出連夜聚眾千百餘人拆毀總局劫奪冊券局
中衣物銀錢搶掠一空並毆首士周超伯等多人
該縣鄧蘭薰僅挈糧書張良佐一名略加懲戒其
餘首從各犯置之不問又本年荆江水未大漲該
蠹書等潛往刨毀潰決二十餘丈致淹毛老等一
百四十餘垆下及沔陽漢陽等處皆受其害等語
收土修隄改設總局行之一年士民稱便該地方

官自應實力奉行用收實效何以該蠹書等輒因無從漁利膽敢糾眾毀局搶劫肆毆如果屬實大干法紀該縣知縣亟應將首從各犯按名嚴拏從重懲辦倘竟徇庇蠹書一味姑容必致益無忌憚首士畏其凌虐不敢承管局事於民命要工大有關係不可不嚴行查究著訥爾經額周之琦親提現獲糧書張良佐並飭嚴拏首從各犯務獲秉公審訊認真研究務即查明潰隄毀局各確情依律究辦並迫出抗繳土費以杜包攬而清積弊至該

縣鄧蘭薰倘查有徇縱情事著即據實嚴參毋稍

姑息將此諭令知之等因欽此當經臣周之琦會

同前督臣訥爾經額遵查道光十六年七月間

監利縣朱三工江隄潰決係因滲漏所致已將

防護不力之監利縣知縣鄧蘭薰署審圻巡檢

戴鴻藻一併參

奏革職賠修奉

旨允行在案承准前因行司委提人卷至省發審即經究出糧書龔紹緒鄧培元吳德潤均有收用

土費錢文私給墨券情弊正在查辦間訥爾經
額旋卽卸事臣林則徐到任恭繹

諭旨飭查各款尤重在蠹書之創毀隄防縣令之得
規徇縱如果屬實倍當從重懲辦然非特委大
員到地確查未易得實卽私收土費亦恐不止
龔紹緒等三人當與臣周之琦會商復委到楚
未久之知府但明倫馳往監利會同先經委往
之通判劉萬慶分別嚴查出示招告去後嗣據
但明倫等稟覆勘明朱三工江隄離監利縣城

七十里上年七月十五日午刻江水漲發該隄
滲漏過水致被沖潰事在白晝斷無私窰之人
且該處朱家村民居稠密潰隄時眾皆目擊如
係被人盜決豈肯甘心受害並據該村紳耆等
公具連名切結悉與查勘情形相符其爲無人
創毀實屬可信又縣令與汛員得受陋規一節
據首士等僉供該縣鄧蘭薰在任每屆上隄防
汛夫馬飯食皆係自發並無派累且改歸總局
收費卽係該令任內所辦更可見其無得規情

事至各汛佐雜惟上隄督工之日由總局支給薪水及夫役飯錢共二千文卽於土費內開銷列入榜示人所共見原因佐雜力難賠墊非州縣可比是以議明請給並非私取陋規其道光十四年土費查首士原派之數應收錢七萬三千餘串局中先後實收四萬餘串中間因有鬧局之事首士散回適值工次搶險截流無人經理該縣鄧蘭董蔣局存收土印券調回陸續催徵費錢二千九百餘串發工濟用此外欠繳土

費除查出龔紹緒等私收外復將欠繳戶名臚列告示如有交與糧書僅收墨券者許其呈首換給印券乃招告多日杳無呈首之人亦無控告庫總糧書別案就近摘傳欠士各大戶訊明未完土費實係原欠未交並無糧書墨券可繳等情旋據委員漢陽府知府楊炳堃錄供由藩司張岳崧臬司程銓詳解前來_臣等隨提人證逐一會鞫緣龔紹緒卽龔振先籍隸監利充當糧書該縣江隄長三百七十餘里從前歲修章

程由隄長自行收費修築乾隆五十四年改爲
官徵官修六十年又改爲簽董承修各給土單
收費興辦迨後頻遭水患花戶逃亡責成糧書
查戶催追其中頑戶蠹書串通隱寄抗欠不繳
董事遂多賠累道光十四年該處士民呈經前
督_臣訥爾經額飭委前監利縣知縣唐樹義會
同現任知縣鄧蘭薰改議城內設立總局遴選
首士八名發給冊券由局徵收土費首士每名
日給飯食錢四百文各汛佐雜上隄督工日給

薪水夫役飯食錢共二千文是年周超伯等充
當總局首士請照闔縣糧額派土六十一萬一
千八百三十三方每方折錢九十六文加礮工
二十四文共收錢一百二十文如該年用有盈
餘留作次年修費又因改局之初不知花戶的
名住址仍令糧書幫收該犯龔紹緒由糧書簽
點庫總不能兼充遂令族翁龔紹琨卽龔仲瑤
冒頂糧書私收土錢六十串未繳糧書鄧培元
亦收土錢四千八百文吳德潤收土錢三千六

百文會給花戶筆據名爲墨券十五年各首士以地方遼闊難以催收稟縣另於鄉間分設散局五處每處首士三名每日亦各給飯食錢四百文計總散各局首士共二十三名十五十六兩年派土均由各花戶自行赴局完交不經糧書之手此十四年改設總局後由首士等添設散局及糧書龔紹緒等私收土費之原委也十六年四月毛家口散局首士秦祖恩因糧書蕭之桐承催十四年舊欠費錢不繳令雇工朱正

榜同派往幫催隄工之縣役曾祥將蕭之桐鎖挈赴局伊兄蕭之棣及鄰人黃海兒等不服卽赴局爭鬧將朱正榜毆傷秦祖恩控縣飭提蕭之桐比催土費旋卽繳清挈獲黃海兒等審不認毆致未詳辦是年七月十五日朱三工隄身滲漏該縣鄧蘭薰聞信前往搶護不及致有潰決城內總局首士周超伯等正欲赴隄適有居近總局之糧書張良佐民人李先懷朱德順周伯讓胡世瀛何利明及未獲之胡世照聲稱田

墓被淹赴局吵鬧將周超伯及局內火夫屈斯文黃道瀧等毆傷並有民人龔經伸龔經輝李先正楊祖欽鄧德華潘學珍姚大幅隨同喧嚷屈斯文等被人乘間竊去錢文衣物周超伯隨以毀局搶奪控縣拏獲張良佐朱德順李先正等均不認搶飭傳人證未到將張良佐羈押待質此又首士秦祖恩鎖拏欠繳土費之糧書蕭之桐及糧書張良佐等因隄潰赴局滋鬧之實情也臣等查糧書龔紹緒等擅用墨券私收土

費雖已供認侵錢六十串及三四串數百文不等恐尙不止此數復向嚴詰據龔紹緒等堅供花戶完交土費向必索取印券以憑收執伊等因與各花戶素來熟悉始肯通融只給墨券現已追繳到官如此外尙有多收業經委員出示招告各花戶何肯代為隱匿自取追呼至十四年首士派土係不分豐歉按閩縣錢糧統派現在未完各戶多係被水災區力難繳費伊等實無朋比為奸把持抗欠質之首士周超伯王修

蘭等亦不能指出憑據詢以此外各書尙有何弊僉稱並無聞見至該縣庫總查係隨時檢點除現充庫總之龔紹緒訊有侵蝕土費卽於本案懲辦外其餘均未指有姓名亦無被控案據復向首士反復開導令其供指均稱不敢妄供矢口不移似無遁飾此案龔紹緒卽龔振先充當書吏輒敢詭列卯名侵蝕土錢至六十串之多實屬玩法若照侵盜錢糧僅擬准徒尙不足以蔽辜龔紹緒應比照蠹役詐贓十兩以上發

近邊充軍例擬發近邊充軍糧書鄧培元吳德潤私收土費錢四千六百文及三千六百文不等未便因其先侵後吐寬免置議應照蠹役詐贓一兩至五兩例各杖一百加枷號一個月均照例刺字張良佐等赴局滋鬧若僅依鬪毆律科以笞罪不足示儆張良佐李先懷朱德順周伯讓胡世瀛何利明蕭之棣黃海兒均請照不應重律杖八十張良佐係糧書應加一等杖九十龔經伸龔經輝李先正楊祖欽鄧德華潘學

珍姚大幅在局隨同喧嚷亦有不合各照不應
輕律笞四十均分別折責發落革役職員秦祖
恩充當散局首士因糧書蕭之桐催費不力輒
令雇工朱正榜擅用鐵鍊將蕭之桐鎖挈進局
殊屬妄爲應請照違

制律杖一百革去從九品職銜朱正榜與縣役曾
祥聽從鎖挈應於秦祖恩杖一百罪上減一等
各杖九十曾祥仍革役蕭之桐雖訊無糾眾抗
士實據但身充糧書承催土費久不繳局致被

首士鎖押滋鬧龔紹琨聽從龔紹緒詭列册名
均屬不合並照不應重律杖八十各折責發落
革役周超伯充當總局首士因潰隄赴搶無及
不協輿情已據稟退應與首士王修蘭等均毋
庸議龔紹緒侵蝕土錢照數追完印券飭給花
戶收執墨券案結銷燬鐵鍊據供丟棄無從查
起胡世照及屈斯文等被竊錢物飭縣緝獲賊
贓另結監利縣知縣鄧蘭薰查無私得陋規其
審辦蕭之桐張良佐二案亦非徇縱惟於縣書

龔紹緒等侵收土費失於覺察已干例議又朱
三工潰口係

奏明責令該縣賠修之工鄧蘭薰補還新隄雖已
捐賠完竣經該管道府驗無草率而搶險截流
用項仍於續徵土費內開銷殊屬非是相應請
旨將革職留任之監利縣知縣鄧蘭薰卽行革任以
示懲儆該縣十四十五年工程久經告竣所
有民欠土費多係被水之戶應免著追至各屬
佐雜雖廉俸無多然汎地距隄皆近督工薪水

飯食應令自行開發不准由局再給嗣後總局
徵收土費不許假手糧書但恐糧里不清戶名
未確應責成該縣押令各書將推收過割之真
名的戶底冊逐一編造清楚交局徵收遇有賣
田過戶亦卽查明更正務使戶名均歸的實毫
無詭混如糧書造冊故意舛錯致悞催收查出
加倍嚴懲以儆奸蠹至設局期於杜弊本不宜
多嗣後仍只於縣城設一總局遴派公正首士
四人經理每日每名准給薪水錢三百文按年

林文忠公政書 卷一
更換不准久充滋弊各鄉散局概行裁撤以節
糜費而慎隄防除備供招送部外所有臣等遵
旨查辦緣由理合恭摺具

奏伏乞

皇上聖鑒訓示謹

奏

稽察隄工總局申禁冒稱書吏片

再楚北江漢隄防延袤二十餘州縣歲需修費
甚鉅而生息款項有限不得不集費於民查歷
來收費辦工或官徵官修或官徵民修或民徵
民修三者皆不能無弊蓋費徵於官則必假手
於吏胥費徵於民則必誘權於董事吏胥之多
舞弊固不待言而董事若不得人亦難駕馭卽
以監利設局收土一事言之當十四年改設之
初卽將土方加派訊據首士等供因是年各垵

被水恐難全數收齊是以酌請多派以防不足
如有盈餘留爲後用等語獨不思被水之區

國賦尙准緩徵豈隄費轉宜多派其不協一也十
四十五兩年收過土費約錢六萬餘串而局中
薪飯等項已開銷至一萬四百餘串之多雖據
僉供逐款榜示實用實銷並無捏冒然於總局
之外分設鄉局加添首士多名此皆足以糜經
費其不協二也首士秦祖恩擅用鐵鍊將欠費
之糧書蕭之桐鎖挈進局致相爭毆在蕭之桐

本非安分自不肯受其欺凌若施諸謹愿之鄉
愚不但不敢與爭並恐不敢赴愬是民間之畏
首士未必愈於糧書其不協三也又查縣卷道
光十四年紳衿公議改設總局條款有著落糧
書催費一條呈縣請行此實自亂其例尤不可
解詰據該首士等同供因不知花戶的名住址
是以仍請飭書幫催夫設局正以杜糧書徵收
之弊而章程條款轉著落其催收是各書侵蝕
之由亦皆首士有以啟之其不協四也溯查該

縣數十年前舊章本係隄長自行收費繼而改
爲官徵官修又繼而改爲簽董給單至道光十
四年復改爲設局收費法已屢變不宜再涉紛
更唯有就總局之章程而加之以稽察局不許
多設人不許多充用不許多開費不許多派首
士必由公舉不許賞緣濫人不許留戀把持至
糧書不許收費而糧戶的名冊檔仍須責令攢
造惟擇其狡獪之尤痛辦一二庶知儆懼所有
局務一切飭縣隨時秉公查覈並責成道府留

心稽察有弊卽除有犯卽懲如或遷就因循察
出一併參處再楚省糧書工書等名目混稱者
多凡在各鄉分催錢漕經手推收過戶者皆假
借書吏名色哄惑鄉農其實祇與白役相同並
非在衙署科房辦事而人數甚衆大縣竟以千
計實屬駭人聽聞從前里書冊書之名疊經
奏明禁革而若輩互爲鬼蜮總以里糧底冊私相
授受故有官革私不革之謠茲_臣等復申嚴例
禁並出示遍諭軍民如再有此等冒稱糧工等

書哄騙侵收者許其指名告發卽予儘法懲辦
務使永除澆習以肅吏治而杜弊源謹合詞附
片縷陳伏祈

聖鑒謹

奏

籌防襄河隄工摺

奏爲閱視襄河新舊隄工分別督飭籌防搶險並
現在水勢情形恭摺奏祈

聖鑒事竊臣前因大汛期內各屬隄防險工林立卽

於六月間附片

奏明出省督防在案臣由漢陽泝流而上經歷漢

川沔陽天門潛江京山荊門鍾祥襄陽各州縣
將南北兩岸隄工量明丈尺分爲最險次險平
穩三項以便稽查防護其河灘寬遠隄堦高厚

幸上游均經保全其報潰之白魚垸長湖垸二處一係下游一係支隄情形較輕現在長湖垸業已補築完竣白魚垸亦已釘椿當飭該縣嚴催業民集費搶築六月下旬水又加長七八尺不等現在甫經消落仍恐秋汛復漲禾稼在地守護不可稍疎而尤莫要於鍾祥京山二縣查從前鍾京交界之王家營隄工潰決頻聞仰蒙特命尙書陳若霖等臨工勘估前任湖廣總督高亨駐工督修經黃州府通判周存義建辦石壩三

命下道挑溜護隄至今十年捍禦極為得力上年訥爾經額在總督任內恐此工一逾固限衆心或有懈弛仍甚可虞復將該石壩三道加培高寬現任益臻鞏固惟京山第五段之張壁口與鍾祥第三工之萬佛寺兩處隄睦目下俱被大溜衝刷隄身壁立極為險要臣親勘之後卽飭該府縣估辦護壩並相勢築做盤頭又於迎溜各段拋填堅大塊石斜長入水追壓到底以資禦護業已設法籌辦不敢請動

帑項至上年訥爾經額奏請修復鍾祥縣第十工
之劉公菴何家潭兩處潰隄共七百二十八丈
並砌辦石壩各工此次經臣親往驗收不獨如
式飽錐且較原估更加寬厚似此險要地段須
得有此結實工程所有賠修之署鍾祥縣知縣
謝慶遠先因該工漫潰奏奉

諭旨革職留任今賠修工竣可否仰懇
天恩准予開復恭候

命下祇遵再襄陽府城之老龍石隄臣亦親至查視

甚屬堅固足資保障除仍督屬加意守護外所
有閱視襄河隄工籌防搶險緣由理合恭摺具

奏伏乞

皇上聖鑒謹

奏

表

襄陽一帶緝私事宜摺

奏為敬陳襄陽一帶緝私事宜仰祈

聖鑒事竊照湖廣界連數省水陸交衝故行銷引鹽

必以堵緝鄰私為第一要務如襄陽府屬處處

與河南連界河南例銷之潞鹽產自山西向係

商運商銷官為稽察商人顧惜身家尙知畏法

即有越販亦易查緝自嘉慶二十五年由晉省

奏准改為商運民銷該處商人將潞鹽運至豫省

陝州所屬之會興鎮分廠存貯聽民人隨時購

木文忠公文書

湖廣奏稿

木文忠公文書

湖廣奏稿

買不拘引數均許轉運行銷而潞鹽課款甚輕
價值本賤若僅在豫省售賣獲利無多一經灌
入楚境與重課之淮鹽相形則人莫不舍貴而
食賤故襄陽一屬名為淮鹽引地而民間率食
潞私溯查道光元年以來該府屬每有片引
不銷之年即設法銷售亦總不及定額十分之
一雖曾

奏明官運鹽二十萬包減價敵私然徒使商本受
虧於鄰私仍不能敵總緣兩省地勢犬牙相錯

水陸無不可通疊經設立卡隘酌派遊巡而侵

越如故自臣到任截至六月底覈計襄陽各卡

挈獲人鹽雖亦報有二十餘起然只零星小販

未據獲到積窩囤戶及大夥巨梟此臣親駐

襄陽復嚴飭營縣分赴各要隘晝夜偵挈兩日

之內據襄陽縣知縣紀昌期挈獲張添祿囤鹽

三千餘斤又襄陽城守營千總馬鵬程等挈獲

張車等犯並鹽三千三百餘斤現俱委審嚴辦

雖一時私販聞風稍可斂戢然病源未除臣一

離襄陽卽難保不又充斥查河南新野縣之白
河與唐縣之唐河皆爲潞私順流而下之路是
以向於襄陽之兩河口地方設立卡座以堵唐
白兩河來船乃梟販日久計生早於未抵兩河
口之先卽捨舟改陸凡附近楚境之村鎮皆有
舖戶囤積晝則兼賣別項貨物夜則專運私鹽
來襄路徑紛歧不能扼其吭領欲緝之於囤聚
之地則又礙係隔省地界員弁兵役不免藉口
畏難考兩淮鹽法志載毗連淮界之鹽店例應

撤退三十里外誠以淮課最重幾至什倍於鄰
省一被鄰私越界售賣在鄰省課輕之地並無
所加而淮南課重之鹽盡爲所擠是以連界撤
店之例不得不嚴疊經前任各督臣移咨豫省
轉飭撤退臣復節次咨催經河南撫臣桂良委
員查勘惟是襄陽連界之店距河南省城皆屬
寫遠囤戶每有所恃不肯依限遷移若必再俟
咨明河南撫臣檄催撤退卽各販之侵越已不
可以數計應請嗣後將連界三十里內照例應

林文忠公政書 湖廣奏稿

撤之鹽店卽由襄陽營縣咨會南陽府屬文武一體差催撤退如再抗不遵撤卽將鹽包起到襄陽充公並將囤戶差掣究辦庶有所儆畏不致任意挨延至唐河係由南陽縣賒旗鎮下船白河係新野縣城外下船該處民間附近食鹽原只計包零買並不必裝載成船其裝船而下者全爲浸灌楚境此固顯而易見之弊相應請旨勅下河南撫臣責令南陽府屬縣汛卡員不得縱令裝鹽下船如有鹽船中途被獲查明由何處

下水卽於審辦時隨案聲明將該處營縣交界議處此外與德安黃州等屬連界之信陽羅山光山商城等縣越界票私亦請一體撤店以免浸灌是否有當謹繕摺具

奏並另繕楚豫交界三十里內地名清單恭呈

御覽伏乞

皇上聖鑒訓示謹

奏

校閱兩湖營伍並苗寨情形摺

奏為校閱兩湖營伍並查視鎮筸一帶苗寨情形

恭摺奏祈

聖鑒事竊臣本年蒞任以後於四月間先將湖北省

附近各標營官兵次第校閱迨六七月內出赴

襄河一帶督防大汛復將襄陽鄖陽施南等處

提鎮協標各營分別考校節經具

奏在案嗣即順途閱視安陸荆門兩營因荆州江

水盛漲趕往防險幸萬城堤等工均保無虞當

林文忠公政書 湖廣奏稿 三

經順閱荊州水陸各營官兵並調宜昌鎮標員
弁到荆考驗事畢由長江下至岳州閱視該處
城守水師兩營復由岳州渡洞庭湖上至長沙
省城會同湖南撫臣訥爾經額閱看撫標左右
兩營暨長沙協官兵並將毆斃首逆藍正樽一
案會覈審辦之後卽赴長沙以上之衡永寶三
府屬將永州鎮標三營衡州寶慶兩協官兵以
次校閱其附近之武岡臨武宜章桂陽嶺東等
營亦經調考維時訪知寶慶一帶有山路可通

鎮竦較之折回長沙從常德辰州正站前往者
程途差近惟因山高路險處處毗連窰崗向來
絕少經行臣思此等險要地方正須於無事之
時親爲周歷察其形勢記其阨塞並可於民徭
交錯之處以稽查爲彈壓示震懾以聲威遂於
邵陽新化漵浦辰谿等縣所轄懸厓深澗之間
繞行累日該處山崗多種包穀今歲收成上稔
間閭甚屬安恬嗣於九月初一日行抵鳳凰廳
城爲鎮竦及辰沅道一同駐劄之所臣以該

處兵勇向有精健之稱一切技藝固須詳加校閱而其中尙有桀驁積習尤宜亟爲轉移竊思訓練二字訓字居練之先更爲切要必其討軍實而申儆乃可進有勇以知方臣當於該處多駐數日先將各員弁考畢再將鎮標兵丁與道標練勇排日考校每日自朝至暮皆閱至數百名於獎賞發落之時逐一剴切曉諭怵之以國法激之以天良使知

恩出自

上不得挾而求令出惟行不得狎而玩伊等聽聞之下叩頭流涕其感懼似出真誠臣復周歷三廳苗寨地方其苗官自守備以及外委咸帶苗兵多名俯伏道旁迎接甚形懍畏又苗舉人生員以及義學師生亦皆在途迎謁均於給賞時諭以循分守法俱各傾聽祇遵所有綏靖鎮標及永綏保靖二協營暨鎮筵鎮轄之沅州靖州綏甯長安四協營亦皆逐一校閱旋由苗疆轉至辰州常德將湖南提標五營乾州永順常德三

協澧州九谿鎮溪河溪永定古丈坪辰州城守
洞庭水師八營次第閱畢計自七月至九月閱
過湖北十五標營湖南三十二標營及道標各
屯員弁兵勇牽計槍箭擡礮中靶分數均在六
七成以上長矛刀棍多有可觀軍裝馬匹亦稱
整壯凡應入軍政之員弁皆經逐名調考其把
總以下不入軍政者如在經過百里之內亦皆
調考若汎地寫遠恐曠巡防目前暫緩考驗仍
於日後乘便補考世職武舉尙未得缺者亦令

隨同校閱又各營兵丁人數衆多除已閱外有
因隔於程途未便概調者有因限於時日未能
全閱者復經頒發全冊責令該管將領校閱登
註以憑遇便抽考或委隔營覆校庶衆兵各項
技藝大概均可周知至員弁中有年力衰邁及
弓馬生疎者臣前已

奏明隨時參劾不必俟至軍政案內始行彙辦計
數月以來降革休致之員弁除把總以下不計
外副將則穆騰額伊齡阿二員遊擊則謝玉陞

盛奎陳增祉三員守備則許勝貴包廷揚鄧高昇羅玉斌王允年洪明臺六員千總則魏光榮李定愷宋履泰朱允秀張勝得柴開泰余化瓏宋代富趙凌霄楊丙一朱長明十一員或革或休或降已先後

題奏咨部在案俱不歸軍政參劾之內其軍政六法人員仍應彙齊覈辦臣現即趕回武昌飭催造册悉心甄別照例依限具

題再臣所過各屬除瀕湖間有被水外餘皆一律

豐登米糧市價極平堪以仰紓

宸廑所有閱視營伍地方情形謹繕摺具

奏伏乞

皇上聖鑒謹

奏

控制鎮筵兵勇並察看各提鎮優劣片

再臣此次親駐鎮筵察情形酌籌控制有正

摺內所未敢盡敘者謹再繕片為我

聖主陳之緣鎮筵地方在萬山之中其人膂力剛強而性情剽悍用之於制敵實能奮勇爭先聚之於平時難免恃強生事駕馭之法本較別處營伍為難又自苗疆設立屯防以後民間田產丈出歸公專靠錢糧以資養贍所以鳳凰廳一隅之地而兵丁練勇合計有五千餘名之多視他

營不啻數倍在當時原爲懾服羣苗起見今苗民久經安貼而營屯轉成積重之形明知兵勇太多而礙難裁減若輩聚集一處角勝爭雄偶有藉端則此倡彼和若不遂意卽逞忿忘生皆已習爲固然恬不知怪此次經臣抉其病根大加訓飭曉以利害禍福尙知感激涕零但易感者其心而難移者其性是以控馭之法不厭求詳臣檢查上年挾借案內欽奉

上諭有人奏苗疆善後事宜一摺著訥爾經額裕泰

楊芳會同詳悉妥議具奏等因欽此查原奏內有將練勇分撥三廳安置以散其勢之語此論本極扼要惟因紛紛移駐轉恐啟其疑懼之心而攜帶家口盤費尤多更無所出是以訥爾經額等仍請暫循其舊臣竊思分散之法與其勒令移駐強以所不甘何如隨時差遣予以所甚願蓋該處人情粗鄙以有利爲喜以有事爲榮其受病在此其得用亦在此卽如徵調出師在別營視爲畏途而該處趨之恐後若尋常差使於

應得錢糧之外加給薪水盤費其踴躍更不待
言又其一家父子弟兄同在行伍者甚多經
逐一查明密記底冊凡一家有數人食糧者俱
暗抽一人出外差遣使之各有瞻顧仍不明示
章程如各卡堵緝私鹽各屬訪拏匪犯之類皆
其所優爲者此往彼還絡繹調派似卽無形之
移駐而自然之分散也現已試行派遣皆甚樂
從臣仍隨地隨時嚴密查察如有未能安靜借
端生事者立予重辦不稍姑息似亦控制之一

道其在本處則專恃該管鎮道約束有方臣在
彼詳細稽查鎮算鎮總兵楊芳辰沅道王簡現
辦營屯事務皆能秉公克己甚洽輿情就目下
觀之實屬十分安靜臣仍諄囑該鎮道總須恩
威兼濟嚴而不失之刻寬而不失之濫始可常
服其心至該處山田磽瘠者多收成本薄而又
路途險隘與別處米穀不通今年雨水調勻堪
稱樂歲倘值年成荒歉各兵勇事畜無資卽難
保其盡能安謐查從前該處儲備銀穀歷因屯

田歲租缺額各項經費不敷遂致逐漸借支無多存貯經調任撫臣裕泰

奏請清查緣款目紛繁尙未結報現在飭催該道趕緊查明不許稍有含混其應如何籌補之處容再會同撫臣訥爾經額設法籌畫另行

奏辦又查該處民人近日傳播謠言謂嘉慶初年民田整合歸公原許於三十年之後仍還民產此時年數已過應請歸還並有欲候臣到之時聯名呈懇者臣一得訪聞即先飭查何人倡議

嚴行拏究於是其風寢息臣復於放告之時將此事廣為宣諭以從前苗匪四出焚殺伊等田產多為苗佔即未佔者亦不能耕種無非四散流亡任其荒廢若不團練丁勇何以戡定頑苗若不均出屯田又何以養贍丁勇豈可於安常處順之後頓忘同仇敵愾之心轉欲自撤藩籬甘尋覆轍該民人等皆無可置喙惟是此等謠言易動鄉愚之聽臣仍諄飭該鎮道嚴密查禁倘再有以此議煽惑平民者即須嚴拏究辦總

之鎮算爲苗疆最要之區而距臣所駐之武昌
省城將及二千里邊防關重實有鞭長莫及之
虞惟當時刻畱心並責成該鎮道務將一切情
形隨時據實稟報以憑察奪至該鎮楊芳原籍
貴州松桃廳距鎮算僅百餘里於該處民情土
俗洞悉無遺上年鎮算兵勇戕害委員蘇清阿
經楊芳在籍聞知卽赴交界防範所全頗爲不
少此次臣至鎮算接見該鎮據稱年老耳沉恐
不足以副

聖慈委任臣見其精神步履均屬健旺並未衰頹惟
聽言稍多之際閒有一二聽得不真不過再與
述說一番似無妨礙其於湖南全省營伍皆曾
統轄而苗疆尤資得力自在

聖明洞鑒之中此外兩省提鎮臣巡閱所至皆已屢
經接見查湖南提督薛陞久歷戎行雖年越七
旬而精力極健在出師自屬老手若論平時營
務固不至廢弛亦未見振作似不及湖北提督
羅思舉之認真羅思舉出身雖非正路而在湖

北提督任內歷十二年操守甚清能自刻苦地方文武異口同聲其所教演雜技皆有裨軍營實用而製造傷藥療治瘡疽尤爲著效士卒民人之疾皆手治之故感激者多該提督自去冬病後差瘦於前然見其上馬登山仍極輕便詢知常時在署兩腳尙繫鐵條其習勞不倦如此似營務不至廢弛至總兵中如湖南永州鎮崇福年力正強辦事頗有才幹可資整飭綏靖鎮明海外貌似屬鈍拙而營務卻甚認真現雖六

十六歲精神尙能貫注此次臣考校湖南營伍該鎮所轄之兵技藝最見出色是該鎮洵堪勝任惟此後精力何如仍須隨時察看又湖北鄖陽鎮滿德坤本年進京

陞見回任未久其人材本屬出衆雖年逾六十而勇銳之概未衰辦理營務大段不差尙須細爲考察又宜昌鎮珠爾杭阿在楚省三十餘年情形極熟惟宜昌爲川江入楚門戶該鎮於督緝川省私鹽前此似未能盡力近日經臣嚴飭務令

於銅鉛船入境之際親往督查究竟能否改觀
尚須於冬令覈計功過再行據實具

奏臣有考察之責總當整頓營伍不避怨嫌斷不
敢稍有遷就謹將一切情形縷晰附陳伏祈

聖鑒謹

奏

整頓鹺務摺

奏為敬陳楚省鹺務設法整頓情形恭摺奏祈

聖鑒事竊臣質本庸愚鹽務尤非所習仰蒙

聖慈委任先經署理兩江總督旋復擢授湖廣總督

於鹺政皆責無旁貸不敢不加意講求因講求
而愈知籌辦之難因難辦而益矢轉移之力其

中曲折繁重情形有非循常蹈故所能收其實
效者故必倍加整頓不敢稍避怨嫌現雖積弊

漸除猶恐久而生玩謹將一切辦法為我

聖主縷陳之伏查兩淮引額除淮北二十九萬六千九百八十二引不在湖廣行銷外其淮南年額應銷鹽一百三十九萬五千五百十引內江蘇安徽江西三省額銷之數僅居四分有零而湖廣銷額幾及十分之六以每引四百斤計之每一萬引即合鹽四百萬斤積而至於七十七萬九千九百餘引之多其爲鹽殆不可以數計此湖廣所以爲淮南最重之口岸也然楚民並不盡食淮鹽如湖北施南一府六縣及宜昌府屬

之鶴峯長樂二州縣均屬例食川鹽湖南郴桂二州屬并衡州府屬之酃縣共十一州縣例食粵鹽是楚省境內本有川粵引地則凡犬牙相錯之處皆不能無影射透漏正不獨湖南永興一縣熬煎粵鹽以灌淮界久爲粵省之所必爭也至應食淮鹽之地亦有離淮較遠例准借食鄰鹽者如宜昌府屬巴東等四州縣之借食川鹽永州府屬道州等五州縣之借食粵鹽鎮筸等處苗疆之借食川鹽皆經宣諸令甲雖定例

不許過十斤以上但一人可買十斤合眾人計之卽不知凡幾矣論者謂行鹽之額定自

國初近來生齒日繁何至歲銷鹽斤轉不能如原定之數此言殆未深考耳查兩淮鹽法志載

國初淮南歲行綱鹽只九十六萬六百八十四引迨後綱食遞有加增至嘉慶七年始符現在引數是淮南現行額引比之

國初原額實多四十三萬四千八百引有零又國初每引運鹽二百斤至雍正年間定爲每引三

百四十四斤嗣後累次加增至道光十一年始以每引四百斤爲定額較之三百四十四斤爲一引者每七引溢出一引以此科算是湖廣所銷之鹽比前又暗加十餘萬引而不覺也竊思原定鹽額每以民數爲衡近數年來湖北湖南兩省報部民數細冊約共五千萬人有零除例食鄰鹽之處至少亦去十分之一其應食淮鹽者約有四千五百萬人以每人日食三錢照例科算是每引四百斤之鹽足供六十人終年之

食卽以所報民數與應銷引數互相比較已恐有絀無贏且生齒旣繁則食鹽之人固多而賣鹽之人尤多民間生計維艱故凡有鹽利可圖之處貧民無不百計挑運四出售私其近川近粵近潞地方與兩淮場竈相距皆遠淮鹽挽運到岸自千餘里至二三千不等而鄰鹽一蹴卽至成本旣輕賣價自賤欲令民間舍近食遠舍賤食貴本係極難之事且以鹽課較之則鄰省皆輕而淮綱獨重卽如川鹽每包一百三十

五斤在大甯雲陽等廠僅納六分八釐一毫卽最重之犍爲廠每包亦只一錢三分四釐若淮鹽一百三十五斤卽該納銀一兩三四錢比川課加重十數倍又查潞鹽每一百二十引爲一名完正雜課銀一百兩若淮鹽一百二十引卽該納銀四百八十兩亦不啻倍蓰雖粵鹽課則臣未深知而考其總數不逮淮課十分之二其輕可知夫以重課之鹽而與鄰界之輕課爭售卽彼此同一官鹽亦必彼贏此縮况又加以無

課之私販紛紛浸灌其勢之不能相敵更不待
言且不特此也潞鹽之行於陝西有應從湖北
鄖陽府經過者川鹽之行於貴州有應從湖南
辰沅等府經過者以淮綱地界而爲鄰鹽必由
之路雖欲禁其私賣勢必不能唯因引地既定
於前若不保衛藩籬則浸灌更無底止是以嘉
慶年間中外臣工屢有奏請以鄖陽改食潞鹽
衡永改食粵鹽辰沅改食黔鹽者均經駁飭不
准是楚省邊境名爲淮界而實不銷淮鹽之處

又去十之一二所恃以行銷者惟在腹地數郡
耳然自黃州以至武昌漢陽凡鹽船經由停泊
之處其爲夾帶腳私所佔者久已習爲故常又
商民各船由江浙來楚每有船戶水手帶鹽私
售且近來淮北票鹽盛行更由安徽之英山霍
山與河南之光山商城羅山等縣灌入黃州德
安漢陽各處故雖腹地數郡亦愈見其難銷更
有一種棘手情形則以商人完課買鹽發給運
腳皆須用銀而市上鹽斤無非賣錢從前銀價

賤時以千作兩照奏案梁鹽每包價銀三錢科
算不過賣錢三百文近因銀貴錢賤三錢庫銀
即合錢四百二三十文縱使市上鹽價較前有
增而以錢合銀實已暗減岸商水販皆惟利是
圖豈甘虧本則招徠愈難今試將高低之鹽一
律牽計每引只算銀十四兩湖廣每年食鹽按
額即須銀一千餘萬兩以錢計之則須一千五
六百萬千文其為繁重甲於各省是運鹽納課
雖在兩淮而輸納營運之費大都出諸兩楚此

臣所以夙夜籌思而兢兢然惟恐貽誤也 臣自

上年三月到任因正二兩月售鹽稀少亟籌設
法疏銷凡所陳奏督屬緝獲各路私鹽及嚴禁
銅鉛船買帶川私與夫襄陽等處撤退鄰境三
十里內鹽店並衡永一帶責成道員督緝各事
宜幸俱仰蒙

訓示並

諭令四川河南各督撫一體稽查俾 臣 得以嚴飭各
屬加倍凜遵認真堵拏如宜昌一帶為川私叢

沐文忠公政書 湖廣奏稿

沐文忠公政書 湖廣奏稿

集之藪則委候補道劉肇紳前往督同宜昌府知府程家頴查拏究出弁兵縱私分肥情弊從嚴懲創又襄陽府屬久被潞私侵佔絕無水販運鹽臣親至其地相度機宜責成安襄鄖道楊以增改立章程並將施南府知府金石聲奏蒙恩准調任襄陽該道府一同出力籌辦潞臬漸見斂退水販卽源源運行又衡州一帶亦久不銷引自臣親到該處飭拏私鹽多起並將卡座奏改遊巡責令衡永道張晉熙會同湖南鹽道李

裕堂督辦近日粵私差少惟距武昌甚遠尙須隨時察看又黃州武穴一帶爲鹽船入楚停泊要日船戶水手與岸上好販串通賣私日甚一日臣派委試用知府但明倫駐劄該處凡有鹽船入境親行催儻並將水痕風色察驗報明如有水跡不符及無故逗遛立卽究辦聞船戶奸販皆憚其嚴凡此遠近卽委各員分飭籌辦仍責令湖北鹽道于克襄督同漢岸總卡委員武昌府同知陳天澤綜司其成此外各府州縣皆

有緝私疏引之責雖楚省向例准其融計銷數而臣惟恐各屬互相觀望會同撫臣周之琦飭令鹽道于克襄按月按季覈計各州縣銷數分別功過先將短銷之黃安縣知縣劉坤琳撤任查辦於是州縣始知做懼競思設法督銷又經該道于克襄捐貲密遣親丁分路緝私尤多起獲是以統計上年兩省所獲私鹽竟至一百餘萬斤之多且獲一斤之鹽即提一斤之課不特有裨庫項並向來捏報邀功朦混搪塞諸弊舉無所施此皆仰賴

聖主洞燭無遺

允臣獲私提課之奏始得欽遵督辦感懷尤深臣又思鹺務事宜仍須恩威並用若一味嚴緝恐窒礙亦多故又剴切示諭紳民曉以利害大意以為每人每日食鹽僅止三錢所費不過一文即官鹽不如私鹽之賤而按日分計所爭亦僅毫釐民間日用飲食何在不可節省而獨於必不能已之食鹽計較毫釐貴賤公然犯法食私在

林文忠公政書 卷三 湖廣奏稿

林文忠公政書 卷三 湖廣奏稿

紳衿應革功名在平民應受滿杖明於利害者
當不至若是之愚且湖廣錢漕最輕比之江蘇
僅及數分之一

聖恩高厚賦額永不加增若於鹽課正供尙相率而
背官食私天良安在除既往姑寬免究外嗣後
責令紳衿大戶以及鄉團牌保互禁食私犯者
公同送究小民見此示諭俱尙聽從又挑賣私
鹽之窮民許其改悔投充肩販由各處官鹽子
店給票挑赴四鄉賣完繳價如此則肩販各有

生路庶可化莠爲良而偏僻村莊皆有官鹽挑
到不得藉口食私於銷引似有裨益查向來民
間匪類大半出於鹽梟卽如襄陽之捻匪紅鬍
爲害最甚總因逼近豫省以越販潞私爲事遂
至無惡不作今自整飭鹽務之後襄陽絕無搶
劫之案並將隔省盜犯挈獲多名是所辦者鹽
務而其效卽不止於鹽務也又各處水販在漢
岸買鹽向給水程一紙運到後須由地方官彙
繳臣恐胥役藉端勒索致水販裹足不前是以

變通辦理俾省浮費以示招徠因事屬細微不敢瑣屑入

告乃准兩江總督臣陶澍移咨欽奉

上諭林則徐會署兩江總督其於鹺務轉運交關之處熟悉情形現經酌定道里遠近限期由水販交付鹽行送局齎道不准由州縣催繳可免需索留難辦理甚為合宜等因臣跪誦之餘益當欽遵妥辦水販因此稍沾微利頗見踴躍買鹽惟此縣之水程轉運別縣售賣者恐致漫無稽考仍應

令其送縣呈查此又隨後續立之章程與前議兩不相悖者也又宜昌府屬例食川鹽之鶴峯長樂二州縣歷由兩淮委員駐劄萬戶沱地方代川辦運原為保護淮界起見而兩淮鹽政相距甚遙倘有借官行私無憑稽察經臣咨商兩江督臣陶澍改為由楚省委員駐辦以便約束並只許就近購運四川巫山縣之大甯廠鹽已足以敷民食不准遠赴數千里之犍為縣裝運花鹽以致下侵荊州等處接准陶澍咨覆意見

亦極相同又從前楚省歷因襄陽宜昌衡州三處額引不銷陸續

奏明官運商鹽前往減價售賣以敵鄰私此意未嘗不善而於利弊未能洞澈不免似是而非是以歷辦並無成效蓋淮鹽成本重大即減之又減總不能賤於無課之私鹽若不認真緝私而欲以官鹽衝其鋒是商本徒虧而鄰私仍不能敵且商人本為牟利必抑價以虧其本則商運愈不前而私鹽愈充斥矣況又訪有一種奸販

轉買減價之賤鹽以灌旺售之引地是為藉寇資盜無異剗肉補瘡臣將此三處之鹽一槩不

令抑價以杜流弊現在襄陽水販運鹽已多宜昌亦已通販衡州則官鹽業經運往水販尙未前來祇須隨時察看情形如水販銷路大暢則官運固可無需即有必須官為倡導之處亦照時價發售務令鹽色純淨秤足味佳不宜抑勒減價以致虧本滋弊其揚商向因減價賠墊立有三鹽名目按引捐貼茲由臣咨明兩淮嚴行

水交是公正書 九集卷三
裁汰不任藉口賠累致礙齟政現聞揚商輸課
倍形踴躍而楚岸售得價銀臣復不時催解赴
揚不任花銷糜費本屆所報銷數有一引卽解
一引之銀務使針孔相符胥歸實在不准如前
之漫無憑證要之銷鹽之暢滯上之視乎天時
下之視乎地利而人力總不可不盡臣竊恐無
可操之券而斷不敢有未盡之心唯賴

聖慈福庇長使年歲豐登隄防鞏固則民力寬裕而
肥腴之奉旨蓄之供售鹽自當更旺此時所屬

各員雖有籌辦出力之處臣均不敢遽行保

奏致啟易視之心務令一力奉行始終無怠庶幾
暢益加暢至私鹽現獲固多然有私總不如無
私之爲妙果使將來銷引愈多而獲私轉少更
足以見化莠爲良之實效臣惟禱祠以求不敢
稍有懈怠以期仰副

聖主委任責成於萬一謹將辦理情形縷晰繕摺具
奏伏乞

皇上聖鑒訓示謹

林文忠公政書

湖廣奏稿

林文忠公政書

湖廣奏稿

九

奏

湖南提督移駐辰州摺

奏為申明舊章請將湖南提督常駐辰州府城以

資彈壓恭摺奏祈

聖鑒事竊照湖北湖南兩省營務從前原歸湖廣提督統轄是以提督駐劄湖南之常德府城為兩省適中之地嗣於嘉慶二年會籌苗疆善後事宜案內准兵部咨以前督臣畢沅奏稱辰州常德均為雲貴往來孔道而辰州逼近苗疆為鳳凰永綏乾州三廳門戶距常德較遠未免鞭長

林文忠公政書

乙集

胡廣奏稿

三

莫及苗疆甫經戡定必得提督常駐辰州稽查彈壓等語應照所請辦理仍俟一二年後察看苗地情形安靜再令提督每歲分作上下半年在辰州常德往來駐劄等情奏奉

硃批依議速行欽此遵於辰州府城建設提督衙門以資駐劄辦公迨嘉慶六年又經

奏准添設湖北提督欽奉

諭旨所有原駐辰州之湖廣提督著改爲湖南提督專管湖南通省營伍事宜等因欽此欽遵在案是湖南

專設提督既不兼轄湖北自應常駐辰州惟因辰州逼處巖疆常德近在都會歷任提督每多駐劄常德非巡閱之年不到辰州與原定章程殊未符合茲新任湖南提督楊芳係由鎮筸鎮總兵蒙

恩簡擢於苗疆營伍最爲熟悉民苗俱極愛戴雖現在苗地甚爲安靜惟距武昌約二千里卽距長沙亦千里而遙控制巡防不得不倍加慎重臣等察覈辰常二府形勢辰州自較常德更爲扼

要且兩處俱建有提督衙署兵制亦久經勻派一切無須更張應請申明原定章程將湖南提督常駐辰州以資彈壓仍於季底酌赴常德駐劄一半月亦不致顧此失彼臣等與提臣楊芳往返札商意見相同謹合詞恭摺具

奏伏乞

皇上聖鑒訓示謹

奏

籌款生息防守襄隄摺

奏為酌籌襄河防汛經費請將前發典商局錢捐湊成數改發漢岸鹽商生息俾搶險得資撥用以固隄防恭摺奏祈

聖鑒事竊照湖北地方半係濱江臨漢民生保障全賴隄防而隄工不獨貴在加修更須嚴於防守夏秋大汛日久工長苟有寸節之疎卽受沮洳之患臣林則徐於上年汎漲之際周歷武漢荆襄各屬督視籌防竊見大江情形固甚險要然

江面較爲寬濶氣勢畢竟舒張以防汎而論尙不至如襄河之急促襄河上承漢源之遠兼有豫省唐白兩河滙流灌入其泥沙之濁數倍於江而水性之曲亦迥異於江惟濁也故河底淤墊而愈高惟曲也故河勢坐灣而愈險溯白十餘年來襄隄之漫潰沖決殆無虛歲推原其故實因經費支絀致有疎防蓋濱漢各州縣隄工除襄陽老龍隄係屬石工尙稱堅鞏外其鍾祥荆門京山潛江天門沔陽漢川等州縣南北兩

岸正隄土性多沙易於沖刷且工長計有十六萬六千一百餘丈其旁出之支河各隄尙不在此數之內若與河工比較則一縣地段皆應分作數廳而向無額設堡房旣乏棲息之所况人夫動須雇倩無可支銷卽民間簽舉隄長一二人責管之地太長仍屬有名無實此外自挑積土牛以及一切守水器具費用甚繁而皆無項可辦將欲責之民力則頻年淹浸之處上而國賦之錢漕下而歲修之夫土尙且催比不前更

安能籌及防險之用將欲出諸官捐則州縣既須責以清廉又須杜其虧空自銀價昂貴以來州縣辦公累者什九其力實有不逮以致籌防棘手呼應不靈一片長隄每有人夫寥寥器具不周之處是其疎虞失事原在意中

國家經費有常何敢冒昧請項然若因循遷就則有一處之潰決卽致數處之漫淹輕而展緩錢糧重卽議蠲議卹揆諸

國計民生均不能不亟為籌畫臣等與各司道察

覈情形再三商酌與其補救於事後莫若籌備

於未然惟有將生息閒款量為挹注庶可為防汛搶險之資查道光十年襄陽地方因緝捕經費無出經前督撫臣奏請動支寶武局存錢八萬串發典生息濟用業蒙

允准迨十六年寶武局暫停鼓鑄案內

奏明將存錢七萬六千餘串發典按年八釐生息照市價易銀解司收入正鑄款內截至十七年底已獲息錢一萬一千五百六十四串有奇此

項息錢並未議定作何支用目下襄河防汛最爲急切要需合無仰懇

天恩俯准援照襄陽緝捕經費成案移撥濟用惟查十六年發典局錢同所得息錢共八萬七千七百六十餘串爲數尙覺畸零臣等擬與司道再行設法籌措量爲捐補湊足十萬串之數如仍發交各屬典商未免散無統紀擬令鹽道于克襄發交漢岸鹽商彙總生息按月八釐每年可獲息錢九千六百串以四千串歸還錢本易銀

解存藩庫其餘五千六百串作爲襄河正隄防險經費於大汛前分別工程之險易隄段之短長令於數里設一窩舖或逐段製置臺篷總使段段皆有人夫晝夜巡防給以工食並責令挑積土牛捆紮柴纜多多益善凡一切守水器具及簣笠柳籬夜間燈燭皆於息項酌給飭辦令州縣造冊呈報該管道府隨時點驗不許缺額虛糜所有印委汛員於大汛時均須督同各夫役及隄長人等無分雨夕常川防守務保無虞

倘敢疎忽失事即將該印委汛員嚴行參辦隄
長夫役一併治罪既給經費不能再有藉口倘
或奇險疊出用項尙有不敷亦由臣等與司道
設法籌捐幫貼似此一轉移間既不動用正款
而經費藉得從容以冀永慶安瀾仰副
聖主慎重隄防之至意謹合詞恭摺具

奏伏乞

皇上聖鑒訓示再防汎所用一切錢文本極細碎且
此項本息係經籌捐湊足請由臣等覈銷免其

造冊送部合併陳明謹

奏

籌議嚴禁鴉片章程摺 戒煙方附

奏為遵

旨籌議章程恭摺覆

奏仰祈

聖鑒事本年五月初二日准兵部火票遞到刑部咨

開道光十八年閏四月初十日

上諭黃爵滋奏請嚴塞漏卮以培國本一摺著盛京

吉林黑龍江將軍直省各督撫各抒所見妥議章

程迅速具奏摺併發欽此 臣查原奏內稱近來銀

價遞增每銀一兩易制錢一千六百有零非耗銀於內地實漏銀於外夷自鴉片煙流入中國其初不過純袴子弟習爲浮靡嗣後上自官府縉紳下至工商優隸以及婦女僧尼道士隨在吸食廣東每年漏銀漸至三千餘萬兩合之各省又數千萬兩耗銀之多由於販煙之盛販煙之盛由於食煙之眾今欲加重罪名必先重治吸食請

皇上嚴降諭旨自今年某月日起至明年某月日止

准給一年限期若一年以後仍然吸食是不奉法之亂民罪以死論等語臣伏思鴉片流毒於中國紋銀潛耗於外洋凡在臣工誰不切齒是以歷年條奏不啻發言盈廷而獨於吸食之人未有請用大辟者一則

大清律例早有明條近復將不供與販姓名者由杖加徒已屬從重若逕坐死罪是與十惡無所區別卽於五刑恐未協中一則以犯者太多有不可勝誅之勢若議刑過重則弄法滋奸恐訐告

誣攀賄縱索詐之風因而愈熾所以論死之說私相擬議者未嘗乏人而毅然上陳者獨有此奏然流毒至於已甚斷非常法之所能防力挽頽波非嚴戔濟茲蒙

諭旨飭議雖以臣之愚昧敢不竭慮籌維竊謂治獄者固宜準情罪以持其平而體

國者尤宜審時勢而權所重今鴉片之貽害於內地如病人經絡之間久爲外邪纏擾常藥旣不足以勝病則攻破之峻劑亦有時不能不用也

夫鴉片非難於革癮而難於革心欲革玩法之心安得不立怵心之法况行法在一年以後而議法在一年以前轉移之機正繫諸此書所謂舊染汚俗咸與維新傳所謂火烈民畏故鮮死焉者似皆有合於

大聖人辟以止辟之義斷不至與苛法同日而語也惟是吸煙之輩陷溺已深志氣無不惰昏今日安知來日當夫嚴刑初設雖亦魄悚魂驚而轉思期限尙寬姑俟臨時再斷至期迫而又不能

驟斷則罹法者仍多故臣謂轉移之機即在此
一年中必直省大小官員其矢一心極力挽回
間不容髮期於必收成效永絕澆風而此法乃
不為贅設茲謹就臣管見所及擬具章程六條
為我

皇上敬陳之

一煙具先宜收繳淨盡以絕饞根也查吸煙之
竹桿謂之槍其槍頭裝煙點火之具又須細
泥燒成名曰煙斗凡新槍新斗皆不適口且

癮難過必其素所習用之具有煙油漬乎其
中者愈久而愈寶之雖骨肉不輕以相讓此
外零星器具不一而足然尙可以他具代之
惟槍斗均難替代而斗比槍尤不可離遇無
槍時以習用之斗配別樣煙桿猶或遷就一
吸若無斗即煙無裝處而自不得不斷矣今
須責成州縣盡力收繳槍斗視其距海疆之
遠近與夫地方之衝僻戶口之繁約民俗之
華樸由各大吏酌期定數責以起獲示以勸

懲除新槍新斗聽該州縣自行毀碎不必覈計外凡漬油之槍斗皆須包封粘貼印花彙冊送省該省大吏當堂公同啟封毀碎無論此具或由搜獲或由首繳或由收覓皆許覈作州縣功過之數若地方繁庶而收繳寥寥者立予撤參如能格外多收亦當分別獎勵一此議定後各省應卽出示勸令自新仍將一年之期劃分四限遞加罪名以免因循觀望也查重典之設原爲斷吸起見果能人人斷

吸亦又何求所謂以人治人改而止也各省奉文之後應由大吏發給告示遍行剴切曉諭自奉文之日起扣至三個月爲初限如吸煙之人於限內改悔斷絕赴官投首者請照習教人首明出教之例准予免罪然投首非空言也必將家藏煙具幾副餘煙若干全行呈繳到官出具改悔自新毫無藏匿甘結加具族隣保結立案報查如日後再犯或被告發或經訪聞拘訊得實加倍重辦其二三四

限之內投首者雖不能概予免罪似亦可酌量減輕惟不投首者一經發覺卽須加重蓋四時成歲三月成時氣候不爲不久果知畏法儘可改圖若仍悠忽遷延再三自悞揆以誅心之律已非徒杖所可蔽辜除初限以外四限挈獲者仍照原例辦理外其初限以外四限以內未首之犯挈獲審實似應按月遞加一等至軍爲止其中詳細條款並先後投首如何減等首後再犯如何懲辦之處均請

勅部覈議施行似此由寬而嚴由輕而重不肖之徒

如再不知悔懼置諸死地誠不足惜矣

一開館興販以及製造煙具各罪名均應一體加重並分別勒限繳具自首以截其流也查開館本係死罪興販亦應遠戍近因吸食者多互相包庇以致被獲者轉少今吸煙旣擬重刑若輩豈宜未減應請一體加重方昭平允但澆俗已深亦宜予以自新之路請自奉文之日起開館者勒限一月將煙具煙土全

繳到官准將原罪量減如係挈獲照原例辦理地方官於一月內辦出者無論或繳或挈均免從前失察處分倘逾限挈獲犯照新例加重自獲之員減等議處其與販之徒路有遠近或於新例尙未聞知不能概限一月投首應請酌限三個月內不拘行至何處准赴所在有司衙門繳煙免罪若逾限發覺亦應論死其繳到之煙土煙膏眼同在城文武加用桐油立時燒化投灰江河匿者與犯同罪

至製造煙具之人近日愈夥如煙槍固多用竹亦間有削木爲之大抵皆煙袋鋪所製其槍頭則裹以金銀銅錫槍口亦飾以金玉角牙閩粵間又有一種甘蔗槍漆而飾之尤爲若輩所重其煙斗自廣東來者以洋磁爲上在內地製者以宜興爲高恐其屢燒易裂也則亦包以銀錫而發藍點翠各極其工恐其屢吸易塞也則又通以鐵條而矛戟錐刀不一其狀手藝之人喜其易售奇技淫巧競相

傳習雖照例懲辦而製造如故應請概限奉
文一月內將所製大小煙具全行繳官毀化
免罪並諭煙袋作坊瓦器窰戶以及金銀銅
錫竹木牙漆各匠互相稽查如逾限不首及
首後再製俱照新例重辦其裝成槍斗可用
吸食者即須論死保甲知情不首與犯同罪
一失察處分宜先嚴於所近也文武屬員有犯
該管上司於奉文三個月內查明舉發者均
予免議逾限失察者分別議處其本署戚友

家丁近在耳目之前斷無不知應勒限一箇
月查明若不能早令革除又不肯據實舉發
即是有心庇匿除犯者加重治罪外應將庇
匿之員即行革職本署書差有犯限三箇月
內查明懲辦逾限失察者分別降調
一地保牌頭甲長本有稽查奸宄之責凡有煙
土煙膏煙具均應著令查起也挾仇訐告之
風固難保其必無但能起獲贓證即已有據
且起一件即少一害雖初行之時亦恐難免

滋擾然凡事不能全無一弊若果吸煙者懼
其滋擾而皆決意斷絕正不爲無裨也至開
館之房主及該地方保甲斷無不知之理若
不舉發顯係包庇應與正犯同罪並將房屋
入官

一審斷之法宜預講也此議定後除簡僻州縣
犯者本少卽有一二無難隨時審辦外若海
疆商賈馬頭及通衢繁會之區吸食者不可
勝數告發旣多地方有司日不暇給卽終日

承審而片刻放鬆則癮已過矣委人代看則
弊已作矣是非問罪之難而定讞之難也要
知吸煙之虛實原不在審而在熬熬一人與
熬數人數十人其工夫一耳且專熬一人容
或有弊多人同熬轉無可欺譬如省會地方
擇一公所彙提被控被挈之人委正印以上
候補者一員往審足矣不必多員也臨審時
恐其帶藥過癮則必先將身上按名嚴搜卽
餒點亦須敲碎然後點入封門如考棚之坐

號各離尺許不准往來問官亦只准帶一丁
兩役隨身伺候不許擅離自辰巳以至子丑
祇須靜對不必問供而有癮之人情態已皆
百出矣其審係虛誣者何員所審卽令何員
出具切結倘日後別經發覺惟原審官是問
以上六條就臣愚昧之見斟酌籌議未知當否
理合繕摺具

奏伏乞

皇上聖鑒訓示再臣十餘年來目擊鴉片煙流毒無

窮心焉如擣久經採訪各種醫方配製藥料於
禁戒吸煙之時卽施藥以療之就中歷試歷驗
者計有九方兩種飲方兩種謹繕另單恭呈
御鑒可否頒行各省以資療治之處伏候

聖裁謹

奏

謹將戒鴉片煙經驗數種良方繕呈

御覽

戒煙斷癮前後兩方總論

人之喉管有二食管以主飲食下達二腸氣管以主呼吸周通五臟氣管本屬清虛不受一粒半滴之物若物誤入其中卽時咳逆必出之而後快而煙乃有氣無形之物故可吸入呼出往來於五臟雖其氣已去而其味仍留但人之所以得生者胥藉胃間所納穀氣循環於經絡以培養其精神今食煙之人其臟肺慣得煙氣以剋穀氣故常人一日不食五穀則饑而憊食鴉片煙者視五穀猶可緩但對時不吸煙則癮而

憊無他正氣爲邪氣所制也本草所載生煙卽今之旱煙其氣辛故止於入肺若鴉片則其性毒而淫其味濇而滯其色黑而入肝腎故一吸而能透於肉筋骨髓之中一呼又能達於肢體皮毛之杪徧身內外上下無處不到是以食纔下咽自頂至踵均覺舒暢遂溺其中始則由漸而常繼則由常而熟至於熟矣內而臟腑經絡外而耳目手足皆必得此煙氣而後卽安一旦無之腎先告乏故呵欠頻作肝因而困故涕淚

交流肺病則痰涎並生心病則痿軟自汗必至是時而起者脾主信故也彼溺乎其中者至是而適受其困矣然溺而知戒不過困於一時溺而不戒則直徇以身命以煙氣剋穀氣引邪奪正其能久乎果其戒之並非難事癮之輕者與體之壯者即無藥方亦可斷絕茲專為受癮深而氣體弱者立前後兩方一日忌酸丸一日補正丸忌酸丸即以煙灰和藥為之緣初戒時不能遽絕故以灰代煙也重用附子者取其走而不守能通行一十二經也佐之以柴胡之左旋升麻之右旋沉香之直達下焦四者相合則徹乎上下表裏頃刻而能徧於一身矣顧吸煙之人中氣無不傷者中氣傷則氣不能化精而血衰故用參芪以補肺氣白朮以補脾氣陳皮木香以利諸氣皆所以安其中也中氣既固再有當歸連柏以涼血而生血且連柏能殺附子之毒以生一源之水且制二相之火也氣血兩虛之人保無昏暈非天麻不能止故加以天麻其

林文忠公政書 湖廣奏稿 七

用甘草者不但可以補中兼可益血並和諸藥也此方氣血兩補而藥味不雜寒熱並用而於理不悖煉以爲丸吞入於胃行氣於五臟輸精於經絡不俄頃亦卽徹頂踵徧內外無處不到是以煙癮不起諸病不作且有沈木二香氣息芬芳藉附子以行之薰蒸於五臟之中吞至數日後若再取過火之煙吸之不獨臟氣與之扞格卽鼻孔聞之已嫌其臭矣補正丸卽以忌酸丸之方減去黃芪木香二味不用附子且不用

煙灰其餘藥味分兩均與忌酸丸方同凡戒煙者先吞忌酸丸至三五日後每日減忌酸丸一丸則以補正兩丸替之減兩丸則以四丸替之照此遞推互相加減至忌酸丸減盡再專服補正丸十日或半月後卽連補正丸亦不用服而癮自斷矣此方歷試歷驗具有神效緣有補中益氣之藥日減有煙之一丸以去邪癮日增補正之二丸以助正氣正氣日足邪無所容卽使至重之癮果能痛自改悔照法行之不過略多數

日未有不能斷絕者全身命以保餘生懔

國法而免刑戮凡有血氣心知之人有不覺悟自

新迷塗早返者哉所有方藥製法詳開於左

忌酸丸方

不日戒煙丸而曰忌酸丸者蓋以既用煙灰吞服之後若與味酸之物同食則令人腸斷而死故以忌酸名方欲服之者顧名知忌耳

生洋參 五錢 白朮 三錢 當歸 二錢 黃柏 四錢 川

連 四錢 炙黃芪 三錢半 炙甘草 三錢半 陳皮 二

錢半 柴胡 二錢半 沈香 二錢 木香 二錢 天麻 三錢 升麻 一錢半

共為細末入生附子七錢米泔浸透石臼中
搗如泥再入煙灰一兩攪勻入麪糊同藥為
丸如小桐子大丸成後共稱重若干約計平
時有癮一分者每日所服之丸須有煙灰一
釐二毫為度必於飯前吞下否則不驗起初
一二日或多吞些合其微有醉意則有煙亦
不思食矣吞定三五日後每日減忌酸丸一

九用補正九二九頂換吞下

補正九方 各藥分兩俱照前方

生洋參 白朮 當歸 黃柏 川連 炙甘
草 陳皮 柴胡 沈香 天麻 升麻

共為細末用蜜和丸如桐子大以之頂換忌
酸丸如初一減忌酸丸一丸則用補正九二
九吞不至初二則減忌酸丸二九又用補正
九四九吞下餘可類推至忌酸丸減盡再服
補正九十日或半月後連補正九亦不用服

矣如癰重者一劑不能盡除即多服兩劑癰
亦必斷

忌酸丸加減法

紅白痢加黃芩白芍 夢遺加龍骨牡蠣 諸
痛加重木香元胡索 咳嗽加紫苑炙冬花炙
枇杷葉 去毛 咳甚者加杏仁阿膠 熱痰加川
貝母瓜蒌霜 寒痰加半夏南星 若覺下焦
有火加黃柏知母 眼暈加丹皮白菊 小便
短加豬苓澤瀉 水瀉加白茯苓車前 身體

不虛者去洋參換沙參炙芪不必用如無頭暈者不用天麻氣短不足者加蛤蚧尾氣喘者加故紙併加蛤蚧尾

以上或入藥或煎湯送下

附錄簡便二方

忌酸補正前後丸方極靈驗矣而配合兩劑需錢數千文彼憚於斷煙者何有所藉口或謂一時乏此整項或謂配合費事有需時日即勸人斷煙者亦未必均肯捐資多製藥丸隨人施給

雖刀圭可以救病如畏難苟安何故又附錄兩種良方皆費錢極少而為效甚捷者庶窮鄉僻壤之地與臺奴隸之微但使一念知悔皆可立刻自醫更何畏難之有嗟夫人孰不欲生若不於此求生則死於煙與死於法均之孽由自作耳可不懼哉所有簡便二方附錄於後此二方用不相連屬

四物飲

赤沙糖 一斤 生甘草 一片 川貝母 八錢去心研細 鴉片

灰

三錢
癮重者四錢

右四物以清水十餘大碗入銅鍋煎兩三時約存三四碗愈濃愈妙將渣漉出取汁貯瓷甕內置靜室無人行處每日早起及夜臥之前各取汁一盃以開水溫服癮即可斷如癮極重者取已煎之汁而重煎之十盃煎成一盃照前再服必效

瓜汁飲

南瓜正在開花時連其葉與根藤一併取下用

水滌淨於石臼中合而擣之取汁常服不數日夙癮盡去甫經結瓜者連瓜擣之亦可用

謹按本草載南瓜甘溫無毒補中益氣截其藤有汁極清如誤吞生鴉片者以此治之即不死是其解毒如神故除癮亦極著效此物最易蔓生雖荒僻村野無處無之惟至冬則藤葉皆枯無汁可取其在夏秋則取之不窮並可不費錢而得凡勸人戒煙者皆宜多取此汁廣貯罈瓮畱以濟人可謂不費之惠

臣向所採輯戒煙斷癮藥方共十餘種而歷試有效者以此數種為最忌酸補正兩丸其法最正四物瓜汁兩飲其用尤便不揣冒昧一併恭錄隨摺進呈是否可以頒行伏候

欽定

鶴峯長樂食鹽專配大甯場以免侵越摺

奏為湖北鶴峯長樂二州縣例食川鹽只應就近認配一場以免牽混侵越恭摺奏祈

聖鑒事竊照楚省額銷淮鹽多至七十七萬九千九百餘引而與川粵潞黔引地處處毗連各處鹽課皆輕而淮鹽獨重各處鹽本皆賤而淮鹽獨貴各處運鹽皆順流而下而淮鹽獨逆流而上故鄰鹽無不越疆估賣而百姓只圖賤價食私堵緝之難久荷

聖明洞鑒臣既不敢請融重課於他省又不敢請移
食岸於鄰封惟有察其透漏最甚之區設法嚴
行禁阻如荊州一府本楚北旺售之地若被川
鹽連櫓下灌則淮鹽斷難行銷故必於荊州上
游之宜昌府屬節節防堵而宜昌所屬卽有鶴
峯一州長樂一縣照例應與施南全府同食川
鹽若論淮界藩籬固難免開門揖盜但該處荒
山瘠土窮民粒食維艱川鹽近在咫尺每斤市
價不過二十文淮鹽到彼則賣價約須兩倍定

例許其買食川鹽原係體卹之意第恐川販乘
機侵灌便無底止是以鶴峯長樂二州縣所行
川引特由兩淮委員赴彼駐劄萬戶沱地方代
川運售意謂兩淮所委之員自必保護淮界無
如其地距淮南遠至四千餘里委員之有無弊
竇在淮難以周知臣上年察看情形咨商兩江
督臣陶澍改爲由楚委員駐辦以便就近約束
並以鶴長二州縣每年額銷川鹽其止水引五
百六十四張陸引八百十一張本屬不多雖歷

辦章程許於四川之大甯雲安犍爲三場鹽斤
通融配運然果只濟該二處民食不圖越界侵
銷則專配大甯一場已屬有贏無絀蓋大甯場
距委員駐劄之萬戶沱僅四百十五里運售最
便雲安場則相距七百餘里其中尙有數十里
旱路委員本不願運若犍爲場則相距三千二
百餘里更屬遙遙然委員不得其人則轉欲遠
運犍爲之鹽以圖影射緣犍鹽色高味美於荆
州一帶最利行銷彼請運犍鹽者乃專圖侵灌

荆州並非爲鶴長二州縣民食起見也臣上年
檄委候補道劉肇紳前赴宜昌一帶與該府程
家頰再三訪察知此弊端稟請嗣後鶴長二處
禁配犍爲鹽斤以免侵灌飭據藩司鹽道會議
僉同咨商兩江督臣陶澍意見極合當卽移咨
四川督臣轉行該省鹽道知照又恐犍爲雲安
二場少配鹽斤或於課額不無稍絀復經商請
以大甯溢配之課劃抵犍雲二場設使尙有不
敷亦由楚省補解足數總使川課絲毫無短臣

林文忠公政書
卷四
湖廣奏稿
三

於本年二月間具奏整頓鹽務情形摺內曾將此事原委彙列上陳欽奉

硃批所論周到妥細勉力而行必有功效欽此欽遵在案旋據湖北藩司鹽道會詳揀委長樂縣知縣蔡聘珍經理其事該委員遵照

奏案就近專運大甯場鹽以濟民食閭閻極爲相安鍵鹽始免下灌於荆郡疏銷淮引甫有轉機適准川省督臣來咨以鶴長二州縣專配大甯場鹽與該省原案不符卽補解課項亦恐路遠

鞭長有誤銷期造冊等語臣復飭司道議覆茲據詳稱鶴峯長樂二州縣均係改土歸流乾隆初年議食川鹽原派引張本無鍵爲在內迨乾隆二十二年至五十年始將長樂一縣續增鍵爲水引至三百一十張而淮界遂爲鍵鹽所灌茲欲嚴杜侵越之害斷不可再行鍵爲之鹽至大甯場鹽如果溢銷其課銀同歸川省自可以贏補絀卽或不然亦由楚省籌款解川補足以免課稅虛懸仍請查照前

奏遵辦等情詳覆前來臣查川楚毗連之處彼此銷鹽界限間不容髮若川鹽侵越一分卽淮鹽細銷一分此乃必然之理果使川課與淮課相等則均之有裨於

帑項臣亦何敢畛域過分今以課額覈之則淮鹽銷得一分幾足以抵川鹽二十分之課其輕重懸殊至於如此似未便聽川鹽之影射而不嚴淮界之藩籬况鶴長原運川鹽本無犍爲在內今議仍還其舊又將額課補足解川是於款項

毫無窒礙而專運大甯近鹽足濟鶴長民食禁運犍爲遠鹽可免直灌荆州截私疏引之方舍此更無他術臣因淮鹽積重時時設法督銷棘手焦心實難言狀不敢因川省現在咨覆稍任游移致令犍爲鹽斤下充淮界又成痼疾謹將整頓鶴峯長樂二州縣運務緣由再行縷晰具

奏伏乞

皇上聖鑒訓示謹

奏

林文忠公政書

乙集湖廣奏稿

三

查勘江漢隄工摺

奏為查視江漢隄工適值襄河秋漲督飭搶護化險為平並現在水勢已落緣由恭摺奏祈

聖鑒事竊臣前因秋汛屆期水勢正在長發當即親赴各屬查工督防業經附片奏

聞在案臣乘舟溯流而上先抵漢川沔陽二州縣境內即見汎水驟至業已盈隄拍岸洶湧異常查覈各處報單並量驗沔陽之仙桃鎮誌椿七月初九初十十一此三日內共長水二丈零一寸

水
文
公
政
書
一
集
胡
廣
奏
稿

漢川北岸之姚兒垸隄長一千九百餘丈香花
垸隄長四千二百餘丈均因被水激蕩間段珩
燧經該縣趙德轍督率垸民在於隄外排豎木
椿捆柴攔護隄上加高子堰隄內趕築裏幫極
力堵衛三晝夜水漸退落隄乃保全其沔陽州
之隄北岸計七十五里南岸計八十五里險處
不勝枚舉而周家橫隄尤爲衝要幸柴土料物
皆已豫備充盈足資搶護又有西毛台垸一隄
形勢坐灣風衝浪激隄內忽有滲水情形甚危

居民挈其家具紛紛遷避該州李兆元與前代
理州折錦元均駐該處督率汛委各員集夫搶
築臣適至隄上察看形勢尙可不至決裂當諭
居民不必驚悸亦不可相率逃避致惑人心正
當隨同地方官捧土束薪盡力守護即可保無
失事時有署沔陽州州判姚正道赤足立於水
中連夜收土督夫塞漏有隙卽填防汛之委員
彭鳳池亦於上下隄段來往飛催奮搨紛集該
隄發漏之處遂得逐漸堵閉並未過水掣通堤

內皖田一望無際皆免淪於巨浸之中實爲至幸_臣復由沔陽上至天門潛江荊門又上而至京山鍾祥則皆在汎漲已過之後隄身出水較高民情極爲安貼所有各縣本屆歲修暨捐修各工除大汛以前完竣

奏明先委道府驗收者此次復經_臣自行覆驗外又據署潛江縣知縣甫經卸事之何渭珍稟呈近日續修工摺查係於歲修之外復經勸捐興辦如方家灣戴家嶺卸甲埠白伏皖等處月隄

新豐皖皮家拐之上下壩座及石盤頭暨各皖老隄加高撐幫之工_臣皆親往錐驗均係礮砌堅實足資抵禦此襄河一帶之情形也至大江水勢向以荊州府城外之楊林磯誌椿爲準自入七月以來據報初三日長水四尺七寸初五日長水二尺二寸初九日長水四尺二寸其在一日間長至數尺之水固不可謂不驟所幸旋長旋落宣洩較靈較之連日泛漲不消者卽爲有閒_臣由荊門州水路至荊州府之萬城隄周

歷履勘本年秋汎水勢自交白露後連日大落已比去年此刻小至一丈有零各段官役兵夫碁布星羅防護亦皆周密隨卽由荆江順流而下查看江陵公安石首監利所修土石各工難易雖各不同辦理均尙如式現居秋分節令水勢似已就平但距霜降尙有一月之期防護斷不容稍懈臣勘過之處卽責成印委各員實力嚴防不得始勤終怠致滋貽悞擬再親歷嘉魚蒲圻咸甯一帶將沿江隄段逐一履勘卽可回

至武昌省城除俟霜降屆期另行照例

奏報安瀾外所有闕視江漢隄工悉臻平穩緣由理合恭摺具

奏伏乞

皇上聖鑒再臣經過各屬正在陸續收成稻穀雜糧均屬豐稔市價亦皆平減堪以仰慰

聖懷合併附陳謹
奏

查拏煙販收繳煙具情形摺

奏爲敬陳楚省近日查拏煙販收繳煙具各情形

恭摺奏祈

聖鑒事竊臣前奉

諭旨飭議吸食鴉片煙罪名當經擬具條款恭摺覆
奏在案臣思此事須待各省奏齊上衷

宸斷奉到

諭旨頒發祇遵而各省遠近不同定議尙需時日恐
民間以爲久無消息或且不必查辦此心稍放

卽不可以復收是以臣與湖南撫臣錢寶琛護
湖北巡撫布政使臣張岳崧熟商目下吸食罪
名雖未定議而查拏總不可稍懈收繳亦不可
稍遲當卽飭屬先訪開館興販之人嚴緝務獲
一面會同出示剴切禁戒並捐廉配製斷癮藥
丸二千料在於省城及漢口鎮等處設局派委
妥員收繳煙槍煙斗及一切器具餘煙果係眞
心改悔查無不實不盡者稟請暫免治罪並酌
給藥料俾其服食除癮以觀後效旋據漢陽縣

知縣郭觀辰稟報拏獲興販鴉片之朱運升一
犯在其船上貨箱內起獲夾帶煙土一千二百
餘兩煙膏八百餘兩嗣又於漢鎮邱第祥棧房
內拏獲興販之何日昇傅桂芳兩犯起獲何日
昇煙土三百五十兩傅桂芳煙土五百兩又鄒
阿三馮奉金二犯先期已回廣東在鄒阿三皮
箱內搜獲煙土二千零七十兩馮奉金本箱內
搜獲煙土九百八十兩又在余萬順棧房內拏
獲興販之范永隆鍾亞長兩犯起獲范永隆煙

土七百二十兩鍾亞長煙土一千二百五十兩
又於在逃之樊益澧夾層床內搜獲煙土八百
五十兩隨有與販之邵錦璋謝長林范中和等
赴府縣自行投首邵錦璋呈出煙土二千餘兩
謝長林呈出煙土九百五十兩范中和呈出煙
土三百六十兩以上孥獲及首繳煙土煙膏共
計一萬二千餘兩又自設局至六月底止已繳
煙槍計一千二百六十四桿皆係久用漬油之
物煙斗雜具俱全臣於未出省以前卽率同兩

司道府逐一驗明先用刀劈繼用火燒就中精
緻華麗之槍斗極巧盡飾之式樣不勝枚舉其
有餘膏殘瀝者拌以桐油再行燒透將灰投入
江心自此次燒燬以後兩局續繳煙槍又據報
有七百餘桿省外各屬所收亦已陸續稟報尙
未彙計統俟臣回省時驗明燒燬並接湖南撫
臣錢寶琛來信南省收繳煙槍亦有二千三百
餘桿臣查近來鴉片煙流毒之深幾於口有同
嗜地方官以爲滔滔皆是不免畏難苟安幸蒙

諭旨特頒飭議重罪奸徒聞有論死之法莫不魄悸
魂驚不特開館與販之徒聞風遠竄並吸食者
亦恐性命莫保相率改圖臣等查看輿情並非
不可挽救是以乘機諭戒寬猛兼施呈繳者姑
許自新隱匿者力加搜捕不追既往嚴儆將來
無非仰藉

聖主德威務令力迴汗俗以目下楚北情形而論除
官製斷癮藥丸外凡省城漢鎮藥店所配戒煙
之藥無家不有無日不售高麗參洋參等藥皆

已長價數倍並有瞽民婦女在路旁叩頭稱謝
據云其夫男久患煙癮今幸服藥斷絕身體漸
強等語是其父子家人平日所不能斷者皆恃
國法有以斷之此時新例尚未頒行而情形業已
如是總因死罪二字足以怵其心志可見民情
非不畏法習俗大可轉移全賴

功令之森嚴始免眾心之渙弛臣惟當督屬隨時
加緊極力湔除俾皆革薄還淳以期仰副

聖主裕國保民之至意其迭經拏獲與販鴉片人犯

之漢陽縣知縣郭觀辰起出煙膏煙土爲數頗多可否

賞予鼓勵之處出自

天恩謹將現辦情形會同護湖北巡撫布政使

臣張

岳崧恭摺具

奏伏乞

皇上聖鑒謹

奏

錢票無甚關礙宜重禁喫煙以杜弊源片

再臣接准部咨欽奉

上諭據寶興奏近年銀價日昂紋銀一兩易制錢一串六七百文之多由於奸商所出錢票註寫外兌字樣輾轉磨兌並無現錢請嚴禁各錢鋪不准支吾磨兌總以現錢交易以防流弊等語著步軍統領衙門順天府五城會議具奏並著直省各督撫妥議章程奏明辦理欽此臣查錢票之流弊在於行空票而無現錢蓋兌銀之人本恐錢重難攜

每以用票爲便而奸商卽因以爲利遇有不取錢而開票者彼卽暗以高價希圖以紙易銀愚民小利是貪遂甘受其欺而不悟迨其所開之票積至盈千累百並無實錢可支則於暮夜闌歇潛逃兌銀者持票控追終成無著此奸商以票騙銀之積弊也臣愚以爲弊固有之治亦不難但須飭具五家錢鋪連環保結如有一家違負責令五家分賠其小鋪五家互結復由年久之大鋪及殷實之銀號加結送官無結者不准

開鋪如違嚴究並拘挈脫逃之鋪戶照誑騙財物例計贓從重科罪自可以遏其流但此弊祇係欺詐病民而於

國家度支大計殊無關礙蓋錢票之通行業已多年並非始於今日卽從前紋銀每兩兌銀一串之時各鋪亦未嘗無票何以銀不如是之貴卽謂近日奸商更爲詭猾專以高價騙人亦祇能每兩多許制錢數文及十數文爲止豈能因用票之故而將銀之僅可兌錢一串者忽擡至一

串六七百文之多恐必無是理也且市儈之牟利無論銀貴錢貴出入皆可取贏並非必待銀價甚昂然後獲利設使此時定以限制每兩只許易錢一串彼市儈何嘗不更樂從不過兌銀之人喫虧更甚耳若抑銀價而使之賤遂謂已無漏卮其可信乎查近來紋銀之絀凡錢糧鹽課關稅一切支解皆已極費經營猶藉民間錢票通行稍可濟民用之不足若不許其用票恐捉襟見肘之狀更有立至者矣夫銀之流通於

天下猶水之流行於地中操舟者必較水之淺深而陸行者未必過問貿易者必探銀之消息而當官者未必盡知譬如閘河之水一遇天旱重重套板以防滲漏猶恐不足濟舟若閉閘不嚴任其外洩而但責各船水手以空淺即使此段磨淺而過尙能保前段之無阻乎銀之短絀何以異是臣歷任所經如蘇州之南濠湖北之漢口皆闐闐聚集之地疊向行商鋪戶暗訪密查僉謂近來各種貨物銷路皆疲凡二三十年

以前某貨約有萬金交易者今只賸得半之數
問其一半售於何貨則一言以蔽之曰鴉片煙
而已矣此亦如行舟者驗閘河之水誌而知閘
外洩水之多不得以現在行船尙未擱淺而姑
苟安於旦夕也臣竊思人生日用飲食所需在
富侈者固不能定其準數若以食貧之人當中
熟之歲大約一人有銀四五分即可過一日若
一日有銀一錢則諸凡寬裕矣吸鴉片者每日
除衣食外至少亦須另費銀一錢是每人每年

卽另費銀三十六兩以戶部歷年所奏各直省
民數計之總不止於四萬萬人若一百分之中
僅有一分之一人吸食鴉片則一年之漏卮卽不
止於萬萬兩此可覈數而見者況目下吸食之
人又何止百分中之一分乎鴻臚寺卿黃爵滋
原奏所云歲漏銀數千萬兩尙係舉其極少之
數而言耳內地膏脂年年如此剝喪豈堪設想
而吸食者方且呼朋引類以誘人上癮爲能陷
溺愈深愈無忌憚傲玩心而迴頽俗是不得不

嚴其法於吸食之人也或謂重辦開館與販之徒鴉片自絕不妨於吸食者稍從末減似亦持平之論而臣前議條款請將開館與販一體加重仍不敢寬吸食之條者蓋以衙門中吸食最多如幕友官親長隨書辦差役嗜鴉片者十之八九皆力能包庇販賣之人若不從此嚴起彼正欲賣煙者爲之源源接濟安肯破獲以斷來路是以開館應擬絞罪律例早有明條而歷年未聞絞過一人辦過一案幾使例同虛設其爲

包庇可知卽此時眾議之難齊亦恐未必不由乎此也吸食者果論死則開館與興販卽加至斬決梟示亦不爲過若徒重於彼而輕於此仍無益耳譬之人家子弟在外游蕩靡惡不爲徒治引誘之人而不錮其子弟彼有恃無恐何在不敢復犯故欲令行禁止必以重治吸食爲先且吸食罪名如未奉

旨飭議雖現在止科徒杖尙恐將來忽罹重刑若既議而終不行或略有加增無關生死彼吸食者

皆知從此永無重法孰有戒心恐嗣後吃食愈多則賣販之利愈厚卽冒死犯法亦必有人爲之是專嚴開館興販之議意在持平而藥不中病依然未效之舊方已耳諺云別足之市無業屨僧寮之旁不鬻榔果無吸食更何開館興販之有哉或謂罪名重則訛詐多此論亦似殊不思輕罪亦可訛詐惟無罪乃無可訛詐與其用常法而有名無實訛詐正無了期何如執重法而雷厲風行吸食可以立斷吸食旣斷訛詐者

又安所施乎若恐斷不易斷則目前之繳具已是明徵若恐誅不勝誅豈一年之限期猶難盡改特視奉行者之果肯認真否耳誠使中外一心誓除此害不惑於姑息不視爲具文將見人人滌慮洗心懷刑畏罪先時雖有論死之法屆期並無處死之人卽使屆期竟不能無處死之人而此後所保全之人且不可勝計以視養癰貽患又孰得而孰失焉夫舜典有怙終賊刑之令周書有羣飲拘殺之條古聖王正惟不樂於

用法乃不能不嚴於立法法之輕重以弊之輕重爲衡故曰刑罰世輕世重蓋因時制宜非得已也當鴉片未盛行之時吸食者不過害及其身故杖徒已足蔽辜迨流毒於天下則爲害甚鉅法當從嚴若猶泄泄視之是使數十年後中原幾無可以禦敵之兵且無可以充餉之銀興思及此能無股慄夫財者億兆養命之原自當爲億兆惜之果皆散在內地何妨損上益下藏富於民無如漏向外洋豈宜藉寇資盜不亟爲

計臣才識淺陋惟自念受

恩深重備職封圻觀此利害切要關頭竊恐築室道謀一縱卽不可復挽不揣冒昧謹再瀝忱附片密陳伏乞

聖鑒謹

奏

嗣後辦災應將蠲緩田畝細冊隨謄黃榜示片
再查湖北省每遇水旱偏災奉到

恩旨蠲緩錢糧俱係立時飭令藩司刊刻謄黃刷印
多張飛行各屬於被災處所及各郵莊集鎮僻
壤窮鄉遍貼曉諭並將貼過地方開明清冊申
報督撫司道府州衙門察覈再令委員覆查倘
有隱匿朦徵情弊不但一查立見卽各處貧民
亦斷不肯甘心緘默必有出而首告之人胥吏
實無所施其伎倆防範本極周密惟被歉地方

不僅一州一縣該州縣中又不僅一村一莊地名極爲繁瑣謄黃內係恭錄

上諭只能開載某州某縣某某等若干邨莊應蠲應緩應遞緩字樣蓋

綸綍頒宣詞有體要勢不能將所有地名一一全敘而各邨莊零星細碎不一而足雖經各州縣造具頃畝細冊詳送院司查覈而民間未必周知奸猾胥吏難保不藉某某等字樣高下其手而狡黠衿民覬覦蠲免卽明知在應徵之列者亦

必狡稱已蒙

恩旨列入緩免之內紛紛訐訟藉控抗糧必應嚴切防維免滋流弊臣再四思維應請嗣後凡遇辦災奉到

恩旨刊發謄黃之時卽由藩司飭令該州縣將所造應蠲應緩應遞緩之村莊頃畝細冊另行繕榜隨同謄黃遍貼曉諭並責成該管道府稽查貼過地方毋許隱匿俾災歎貧民一目瞭然胥吏更無從滋弊弄法而成熟邨莊亦無可覬覦混

行爭執矣是否有當理合附片陳明伏乞

聖鑒訓示謹

奏

江漢安瀾隄防鞏固摺

奏爲江漢普慶安瀾隄防一律鞏固恭摺

奏報仰祈

聖鑒事竊照江水自川入楚由巴東至黃梅計歷十
八州縣始交江西之九江漢水自陝入楚由鄖
縣至漢陽計歷十三州縣始出漢口而與江匯
除上游依山爲岸不必隄防外江自荊州而下
兩岸設隄幾及三十萬丈不獨以導四川之水
並湖南廣西貴州諸水凡注於洞庭湖者涓滴

無不入江即無不賴隄為障漢自襄陽而下兩岸設隄幾及十七萬丈亦不獨以導陝西之水凡豫省西南一帶匯入唐河白河諸水無不奔赴襄陽與漢合流故統謂之襄河且其水性善曲泥沙尤多灘嘴易生河形屢變考之志乘自前代時此塞彼潰已無虛歲我

朝以來遠年案卷雖難盡稽而第觀前督臣汪志

伊於嘉慶十三年

奏辦隄工摺內聲敘乾隆五十三年萬城隄決口

以後連年漫潰各工共五十餘處自數十丈至數百丈不等而自嘉慶十三年至今又三十載除萬城大隄歷年

奏報安瀾外其他漫潰之處稽諸案卷則亦無歲無之總由來源多而水勢太驟泥沙積而河底日高隄下田廬有較水面低至數丈者是以蟻穴之漏即勢若建瓴而波及之區皆形同仰釜一處潰則處處之橫流四溢一年潰則年年之潰水長淹

國賦所關民命所繫均非淺鮮此_臣所以責令各屬喫緊修防不敢稍予鬆勁而伏秋大汛之際尤必親赴荆江襄河等處周厯稽查相形勢以飭加防聚料物以資搶辦此岸有險彼岸相幫上段有險下段同護雖汎水之來忽以尺計忽以丈計不能全有把握而人事之應盡者均不敢不竭其心力在_臣一人心力曾有幾何而惟以身先之即人人之心力皆不能不為_臣用也伏查今年水勢盛漲之時省城皇華館誌椿長

水至三丈四尺一寸上游萬城隍楊林磯誌椿亦長至二丈六尺二寸是江流已極浩瀚而襄河於七月初九至十一日復陡長二丈有零幾於措手不及幸本屆歲修工段尺寸俱屬認真礮工無不套打而_臣節次所奏改築新隄退挽月隄之處或籌動息款或鳩集捐資以及設法豫備防險經費均經仰奉

恩諭訓誨周詳俾得恪遵辦理今蒙

聖慈福庇處處修防穩固化險為平現已節過霜降

水落歸槽江漢數千里長隄安瀾普慶並支河
裏隄亦無一處漫口實爲數十年來未有之幸
臣欽感之下兢慄彌深仍當乘此水落之後飭
令該管道府巡歷各隄查照盛漲水痕將應辦
歲修各工及早估辦務令工料愈加堅實丈尺
愈見高寬俾來年汎漲捍衛有資庶幾歲歲安
瀾以仰副

聖主保乂民生至意再管理隄工之員除巡道職分
較大不敢請獎外其府縣暨汎委各員自估修

以至防險固皆分內之事但工長日久亦各著
有微勞而費絀事繁每係出於捐辦且歷遇漫
工潰口無不卽予劾參今於數十年中幸值全
境隄防一律保固官民慶忭無不倍感

皇仁可否仰懇

天恩酌加獎勵俾修防各員益知奮勉出自

聖主鴻慈如蒙

俞允容臣會同撫臣擇其尤爲出力者酌保數員恭

候

恩施不敢稍有冒濫所有江漢普慶安瀾緣由謹會

同湖北撫臣伍長華恭摺具

奏伏乞

皇上聖鑒謹

奏

